



daspö il 1918

*Statüts dal
club da skiunzs
Sarsura Zernez*



Register

I.	Nom e domicil	3
II.	Mera e dovairs	3
III.	Commembranza	3
IV.	Etica e doping	5
V.	Organs dal club	6
VI.	Disposiziuns finalas	8



I. Nom e domicil

1. Il club da skiunzs Sarsura Zernez (in seguit nomnà club) es üna società tenor dret Svizzer e suottastà a las ordinaziuns dal art. 60 dal cudesch civil.
2. Il domicil dal club es a Zernez.

II. Mera e dovairs

3. Il club da skiunzs Sarsura Zernez es ün'uniun chi promouva e sustegna tenor sias pussibilitats ils sports d'inviern radunats suot la federaziun internaziunala da skis (FIS).
4. Il club es politicamaing e confessiunalmaint neutral.
5. Il club suottastà cun tuot seis commembers a la società da skis svizra (Swiss-Ski) respectivamaing a la società da skis grischuna (BSV) ed es tras quai oblià da prestar contribuziuns invers quellas. Inavant valan pel club eir lur statüts, reglamaints e las directives generalas.
6. L'administraziun suottastà al president.
7. Il club as finanziescha cun contribuziuns dals commembers, entradas da cuorsas, donaziuns e regals, da fits, da la contribuziun da cumün e da mobiglia ed immobiglias.

III. Commembranza

8. Il cds Sarsura sustegna e rispetta ils drets dals geners. Nus lain eir satisfar ad üna lingua chi resguarda quels drets. Per avair però statüts inclegiantaivels vain dovrà in seguit pels commembers/bras be plü la fuorma masculina.
9. Il club cugnuoscha seguaints commembers:
 - organisaziun giuvenila (oj)
 - juniors
 - commembers activs
 - commembers passivs
 - veterans (commembers passivs cun 40 ons commemoranza)
 - commembers d'onur
10. Giuvenils (oj) sun deliberats da contribuziuns invers il club, il BSV e Swiss-Ski. Bainschi pajan els però üna somma annuala, fixada aint ils reglemaints, per cuorsas e trenamaints. Giuvenils nun han il dret da vuschar. Per ch'els sajan rapreschantats in società sto almain ün genituor avair la commemoranza dal cds Sarsura.



11. Juniors (annadas tenor la classificaziun valabla da la FIS), commembers activs e commembers passivs han il dret da vuschar e sun obliats da prestar contribuziuns invers il club, invers il BSV ed invers il Swiss-Ski.
12. Seguond la decisiun dals 25 gën 2016, trattada a la delegiada da Swiss-Ski, nu vegnan tut sù plü ingüens commembers libers.
Sco fin qua po il club annunzchar persunas cun daplü da 40 ons commembranza (sainza quintar ils ons aint illas organisaziuns giuvenilas) a Swiss-Ski. Talas survegnan in seguit la plaketta d'or per lur fideltà invers las organisaziuns. Ellas restan inavant illa categoria commembers passivs, han il dret da vuschar e sun obliadas da pajar las contribuziuns al club, al BSV ed a Swiss-Ski.
13. La suprastanza ha il dret da propuner commembers chi s'han ingaschats ourdvart d'urant lur commembranza, sco commembers d'onur. La commembranza d'onur sto gnir fatta bun da la radunanza. Quists commembers valan administrativamaing per Swiss-Ski, sco commember da la categoria uffiziala chi's cunfà tenor ils criteris dals statüts Swiss-Ski. Els ston prestar inavant lur commembranza invers il BSV e Swiss-Ski.
14. Commember dal club po esser mincha persuna chi ha accumulä 16 ons, chi sustegna la mera, chi nu donnagescha l'aspet dal club e chi nu cuntrafà a quists statüts.

Annunzchas pon gnir fattas a bocca, in scrit o sur l'adressa electronica dal club, a la suprastanza.

La commembranza cumainza cun l'on da gestiun.
15. La suprastanza decida cun majorità da las vuschs sur da l'admissiun o l'exclusiun da commembers. La persuna pertocca po recuorrer cunter la decisiun da la suprastanza in scrit a man da la radunanza generala. Quella decida sur dal cas ultimativamaing cun 2/3 da las vuschs preschaintas.

Commembers chi nu seguan lur obligs invers il club, neir davo esser gnüts admonits, pon sün dumonda da la suprastanza gnir exclus dal club, davo üna votaziun da la radunanza generala. Pretais vain üna majorità da 2/3 da las vuschs preschaintas per excluder persunas da l'unìun.
16. Ils commembers vegnan partits aint in las categorias d'età seguond ils regulativs da la federaziun internaziunala.

Müdamaints da categorias d'età succedan automaticamaing.
17. Mincha persuna chi survain la commembranza dal cds Sarsura Zernez es al listess mumaint eir commember da Swiss-Ski e dal BSV cun tuot ils drets e dovairs. Ella as declera perincletta cha'l club possa dar inavant las adressas e las datas necessarias per scopos administrativs a las associaziuns superiuras.
18. La società as permetta eir da publicar fotografias dad occurrenzias internas, da podests e da cuorsas cun participants dal cds sün la pagina d'internet ed in medias socialas, sainza dumandar explicitamaing permiss a las persunas pertoccas. Dal rest as obliescha il cds da resguardar la protecziun da datas tenor ledscha valabla (art 13 constituziun federala) e da protegger la sfera privata dals commembers.
19. Mincha commember survain sün dumonda via adressa uffiziala d'e-mail il rendaquint, glistas da tractandas, protocols obain otra documainta na publichada sün la pagina d'internet per posta electronica. Il rendaquint es eir expost a la radunanza in fuorma da palperi.
20. Ils commembers dal cds Sarsura Zernez as tegnan vi da las reglas actualas da la federaziun. Els s'abstegnan da mincha fuorma da nosch'influenza e manipulaziun pro concurrenzias da sport e seguan a las prescripziuns confuormas, als reglamaints da la federaziun sco eir als statüts d'etica da Swiss Olympic.



21. Ün commember chi voul sortir dal club ha da far quai cun üna annunzcha in scrit o sur l'adresa electronica fin als 30 settember da l'on scadent. Davo quista data vala la commembranza automaticamaing per ün ulteriur on cun tuot ils drets e dovairs.
22. Las contribuziuns dals commembers vegnan fixadas da la radunanza generala. Quistas vegnan inchaschadas al principi da l'on da gestiun.
Mincha commember ha il dret da far dumondas chi ston gnir trattadas in radunanza fintant cha talas vegnan fattas in scrit e deponadas almain 5 dis avant la rg pro'l president.
23. Per tuot ils obligs finanzials dal cds Sarsura Zernez sta bun be il possess da quel. Garanzias persunalas da singuls commembers nu pon gnir fattas valair.

IV. Etica e doping

24. Sco commember da Swiss-Ski suottastà il cds Sarsura Zernez cun tuot seis commembers a la charta d'etica, als statüts d'etica ed als statüts da doping da Swiss Olympic sco eir a la documainta chi precisescha quels statüts.
25. Probablas cuntrafattas invers ils statüts da doping e dad etica vegnan retscherchadas e sancziunadas da Swiss Sport Integrity a man dals cas definitis aint ils statüts d'etica.

Tuot ils oters cas vegnan güdichats ed eventualmaing eir sancziunats tenor las ordinaziuns dals statüts da doping e quels dad etica, unicamaing dal güdisch da sport svizzer. Excluz da quists process sun tribunals stadals.

La via da dret as orientescha a las ordinaziuns ed als regulativs accompagnants dals statüts da doping e statüts dad etica.



V. Organs dal club

26. Ils organs dal club sun:

- a) la radunanza generala e las radunanzas extraordinarias
- b) la suprastanza
- c) ils revisurs da quint

a) la radunanza generala e las radunanzas extraordinarias

27. La radunanza generala es il plü important organ dal club. Ella vain clomada aint da la suprastanza e manada dal president. L'invid sto gnir publichà il plü tard 2 eivnas avant la radunanza. Quella ha lö minch'on a la fin november o principi december ed ha las seguintas tractandas:

- elecziun dals scrutinadurs
- prelecziun ed approvaziun dal protocol
- rapports dal president, schefs da disciplinas, da material e dal guardgiachamonna
- rendaquint e rapport dals revisurs
- revisiun dals statüts e dals regulativs
- fixaziun da las contribuziuns
- tscherna da la suprastanza e dals revisurs da quint
- accoglientscha ed exclusiun da commembers
- acceptaziun dal program da l'on
- decisiuns sur da dumondas da commembers entradas in scrit almain 5 dis avant la radunanza.
- discussiun e varia.

28. Radunanzas extraordinarias pon gnir convocadas da la suprastanza o scha almain 10 commembers giavüschan üna tala cun üna dumonda in scrit a la suprastanza.

29. La radunanza generala decida cun 2/3 da las vuschs scha almain 15 commembers sun preschaints:

- sur da müdamaints dals statüts
- sur da l'admissiun o l'exclusiun da commembers sco ultima istanza in cas da recuors
- sur dal schogliamaint dal club

b) la suprastanza

30. La suprastanza vain eletta da la rg cun majorità relativa. La tscherna vain fatta averta. Sch'ün commember giavüscha ün'elecziun per scrutin, decida la radunanza sur da la proposta cun majorità relativa.

31. Per gnir elet in suprastanza as sto esser commember dal club.

32. La dürada d'uffizi da la suprastanza importa 2 ons. Ils commembers da la suprastanza pon gnir reeletts. Il temp in carica nu stuvess surpassar 12 ons.



33. La radunanza ha da resguardar pro las tschernas cha'ls geners sun rapreschantats in suprastanza cun almain 40%.
34. In cas d'üna vacanza d'ürant l'on tscherna la suprastanza ün substitut pel rest dal temp d'uffizi. Tal po gnir reelet davo il temp regular da la radunanza.
35. La suprastanza as cumpuona:
- dal president
 - da l'actuar (vice-president)
 - dal chaschier
 - dal schef da material
 - dals schefs da disciplina (inquant cha las disciplinas vegnan pratichadas in società)
 - d'ün rapreschantant dals atlets (scha avantman atlets da cader chi's mettan a disposiziun)
 - 2 revisurs da quint chi nu fan part a la suprastanza

Il president maina las tschantadas e la radunanza generala. El ha vusch da tagl in cas da parità da vuschs. In cas d'impedimaint surpiglia il vice-president il presidium. Il president survaglia ils differents dicasteris e maina l'administraziun.

L'actuar (vice-president) maina insembel cul president tuot la correspundenza, redigia ils protocols e rimplazza al president in cas d'impedimaint.

Il chaschier es respunsabel per las finanzas dal club. El administrescha la chascha e pissara per tuot las quittanzas. El paja ils quints, maina üna glista da commembers ed annunzcha quels a Swiss-Ski ed al BSV.

Ils schefs da disciplinas han la surviglianza da lur sparta ed han contact culs manaders da las organisaziuns giuvenilas.

Els survaglian l'andamaint illas organisaziuns giuvenilas e protegian ils atlets scha trenaders fan abüs da lur posiziun. Els sun, insembel culs suprastants, las persunas da fiduzcha per atlets (resp. lur genituors) chi's saintan discriminats, nüzchats oura, trattats mal eui. da lur manaders. Inavant guardan els cha'ls trenamaints sajan adattats a l'età dals sportists per evitar surcharg e feridas.

Il schef da material pissara per bun uorden dal material. El es respunsabel cha'l material vegna retuornà e miss in magazin sco cha quel es gnü surdat. Per la fin da l'on da gestiun fa el ün inventar dal material a man dal chaschier.

36. La suprastanza rapreschainta il club vers l'intern e l'extern. Ella decida chi chi ha dret da suottascripziun.
37. La suprastanza es cumpetenta per tuot ils affars dal club. Ella vain convochada e manada dal president. Mincha commember da la suprastanza ha il dret da pretender tschantadas cun indicaziun da las tractandas. Per trar decisiuns ston esser preschaints almain 3 commembers.
38. La suprastanza po disponer sur dad üna somma fixada da la radunanza e protocollada aint il regulativ sainza stuvair consultar mincha vouta il suveran. Tuot ils imports chi surpassan quella somma ston gnir fats bun da la radunanza



c) ils revisurs da quint

39. Ils revisurs da quint vegnan elets da la radunanza generala per 2 ons. Els pon gnir reelets da la radunanza per ulteriurs temps d'uffizi.

Ils revisurs controllan il rendaquint da la società. Els han adüna la pussibilità da tour cugnuschentscha, saja quai dal rendaquint sco eir da documainta e quittanzas. Tuot las conclusiuns e resultats da lur lavur rapporteschan els a la radunanza.

40. Ils suprastants fan lur dovair cun premura ed efficienza tenor meglder savair e saimper a favur dal club. Sch'ün suprastant riva in conflicts d'interess cun tractandas da la suprastanza, sto el far a savair quai al president ed as retrar per quella discussiun e decisiun dal gremi. Implü til esa scumandà dad influenzar oters suprastants in connex cun quel cas. L'absenza da tala persuna a la decisiun sto gnir protocollada.

Scha'l conflict d'interess pertocca al president infuormescha el a seis substitut.

41. Vess ün suprastant da schnejar imbüttamaints da conflicts d'interess invers el, retschercha e decida la suprastanza sainza l'achüsà, scha tal as po eir inavant participar e decider sur da la fatschenda pertocca.

42. Commembers da la suprastanza nu's das-chan s-chaffir, tour incunter o surdar ingüns privilegis chi pon avoir da chefar o chi dan l'impreschiun d'esser colliats cun lur mandat in società e chi han daplü co be üna valur simbolica.

VI. Disposiziuns finalas

43. L'on da gestiun dal cds Sarsura Zernez düra dals 1 november fin als 31 october.

44. Müdamaints dals statüts pon gnir decis be da la radunanza generala cun üna majorità dad almain 2/3 dals commembers preschaints.

45. Per tuot ils cas chi nu sun reglats in quists statüts valan ils statüts da las federaziuns superiuras (Swiss-Ski/BSV) sco eir ils artichels correspondents da la ledscha civila svizra.

46. Taxas, spaisas, cuntribuziuns, eui. vegnan trattadas aint ils reglemaints agiunts als statüts.

47. In cas d'ün schogliamaint dal club va la facultà, davo chi sun pajats tuot ils debits, al cumün da Zernez a favur d'ün ventur club cun listessa mera. Davo 10 ons decida la suprastanza cumünala sur da l'adöver.

48. Quists statüts rimplazzan quels dals 14 december 1918 e quels dals 11 december 1987. Els aintran in vigur cun l'approvaziun da la radunanza generala.

Acceptà da la radunanza generala dals 13 november 2025

il president:

Marco Eichholzer

l'actuara:

Sandra Werro